

夢占類考

夢占類考卷七

長洲張鳳翼自述編

爵祿部

太子樂卽位於廟

宋元公將爲公故如晉

魯昭公爲季氏所逐宋元公欲納之

夢太子樂卽位

於廟已與平公服而相之曰召六卿公曰寡人不佞不能

事父兄以爲二子憂寡人之罪也若以群子之靈獲保

首領以沒唯是楸柎所以藉幹者

楸柎棺中冬林也幹骸骨也言棺歛之禮所以

薦藉骸骨者

請無及先君仲幾

宋大夫

對曰君若以社稷之故私

心宴群臣弗敢知若夫宋國之法死生之度先君有命

臣以死守之弗敢失隊臣之失職常刑不赦臣不忍其死君命祇辱宋公遂行己亥卒於曲棘

左傳

牢之坐其處

王恭舉兵赴京師上表以討王愉司馬尚之兄弟爲辭夜夢劉牢之坐其處曰謂牢之曰事尅卽以卿爲北府因遣牢之率帳下督顏延先據竹里元顯使說牢之啗以重利牢之乃斬顏延以降恭敗朝廷卽以恭位號處牢之如所

夢云

晉書

遣使拜命龍驤將軍

秦主苻健之入關也夢天神遣使者朱衣赤冠命拜苻堅

爲龍驤將軍健翌日爲壇於曲沃以授之健泣爲堅曰汝祖昔受此號今汝復爲神明所命可不勉之北史

服袞衣升座

姚襄之寇洛陽也夢其弟長服袞衣升御座諸酋長皆侍立明日謂將佐曰吾夢如此此兒志度非常或能大起吾族及襄死至太和九年長自稱秦王建年號稱制行事北史

身不得傳世封

魏宗室弼嘗夢人謂之曰君身不得傳世封其紹先爵者一紹遠也紹遠卽暉業字也弼覺以告暉業後爲季父

尚書僕射麗因于氏親寵遂奪弼王爵橫授兄子誕弼乃
托疾入山布衣蔬食至弼卒暉業訴之乃復王爵如所夢
云止矣

王必維之

梁元帝始在潯陽夢人曰天下將亂王必維之及踐祚乃
爲魏所滅梁書

改封中山

梁始興王蕭憺夢改封中山王策授如他日意頗惡之數
旬而卒追贈之典及焉梁書

升於台鉉

陳世祖嘗嘗夢章昭達升於台鉉及旦以夢告之後以功授鎮前將軍開府儀同三司一日侍讌世祖顧昭達曰卿憶夢否何以償夢昭達對曰當効犬馬之用以盡臣節自餘無以奉償

陳書

召為主簿

劉赤斧者夢蔣侯召為主簿期日促往廟陳請毋老子弱情事過切乞蒙放恕會稽魏過多材藝善事神請舉過自代因叩頭流血廟祝曰特願相屈魏過何人而有斯舉赤斧固請終不許尋卒

興俊令

劉書常夢貴人若吏部尚書者補書爲交州興俊令籍而
密書記之未幾卒後旬餘其家幼女鬼語辭似書云我被
用爲興俊縣令得暇暫來倏辭別云

北史

二女報中第

唐鍾離介寓長安夢二女揖之曰吾家孟溪君今中第尹
吾邑矣已而果如其言介既至仙居求其跡廟而祀之名
曰慈感

五品文書已過天曹

戴胄素與沈裕善胄以唐貞觀七年死至八年八月裕在
州夢胄着故弊衣顏容甚頽見裕悲喜裕問公生平修福

今者何爲荅曰吾昔誤奏殺人吾死後他人殺羊祭我由
此二事辯荅辛苦不可具言今亦了矣因謂裕曰吾平生
與君友善竟不能進君官位深恨于懷君今日得五品文
書已過天曹相助欣慶故以相報言畢而寤九年春裕將
歸江南行至徐州奉詔書授裕五品爲婺州治中

實報記

任調拜相

張鎰大曆中守工部尚書判度支因奏事稱旨代宗面許
宰相恩澤甚厚張曰冀望而累旬無信忽夜夢有人自門
遽入抗聲曰任調拜相張公驚寤思中外無其人尋譯不
解有外甥李通禮者博學多智張因召令研其理李沉思

良久因賀曰舅作相矣張詰之李荅曰任調反語饒甜饒甜無逾甘草甘草獨爲珍藥珍藥反語卽舅名氏也張甚悅俄有走馬吏報曰白麻下公拜中書侍郎平章事

集異記按

反語解夢殊支離李特計張將大拜故強解以悅之耳

此州刺史

崔龜從以大理評事從事河中府一夕夢與人入官署見有人當陽儀衛甚盛擗管視狀若決事者因疾趨及階拜唯而退行及西廡下牖問文簿堆積於大格若今之吏舍有吏抱案而出因迎問之此當是陰府某願知祿壽幾何吏應曰二人後且皆爲此州刺史無勞閱簿也及出門又

見同時從事席地而樗蒲寤大異之明日入公府話於同舍皆以爲吉解曰君夢得君而又見樗蒲蒲者蒲也君後當如主公節臨蒲州矣開成中出爲宣州去前夢二十年矣至郡吏告曰敬亭神賓州人所嚴奉每歲無貴賤必一祠焉以故廉使輒備禮祠謂龜從時病至秋乃愈因謁廟及門恍然屏上有畫人抱案而鞠躬乃夢中吏也龜從後入相罷爲少保歸洛卒

十年作襄刺

高元裕於太和三年任司勳員外郎寓宿南宮書夢有人告曰十年作襄刺史既寤私異之因援毫以隱語記于廳

之東楹掩映處曰大三寤襄刺十年洎開成三年爲御史
中丞遂謂夢固虛耳是後出入中外數歷貴位至大中二
年由天官尚書授鉞漢南自題記後解署補葺亦屢矣且
謂楹上字無復存也及與好奇士同往觀之則毫翰煥然
獨存高因屈指以今之年加曩之十乃二十年矣

集異記

光晟拜相

張光晟家甚微而有才用性落魄嗜酒壯年爲潼關卒屢
被主將鞭笞因奉役至華州盛暑驅馳心不能平過嶽祠
遂脫衣買酒致奠金天王朗言曰張光晟身負才器未遇
知己富貴貧賤不能自料惟神聰鑒當賜誠告禱訖因飲

大醉晝寢于碑堂忽夢傳聲云喚張光晟迫感甚急卽入
一府署嚴邃異常導者云張光晟到拜跪訖遙見當廳貴
人有如王者謂之曰欲知官祿但光晟拜相則天下太平
言訖驚寤冷汗後積勞官至司農卿及建中德宗西狩光
晟爲朱泚所縻奉泚甚力每有戰常在其間及神慶之陣
泚拜光晟僕射平章事統兵出戰大敗而還天下遂太平
方寤神告云

集異記

何僕射

何致雍者賈人之子也幼而爽俊好學嘗從其叔父泊舟
皖口其叔夜夢一人若官吏乘馬從數僕來往岸側徧閱

舟船人物之救復一人自後呼曰何僕射在此勿驚之對
曰諾既寤徧訪鄰舟皆無姓何者乃移舟入深浦中翌日
大風濤所泊舟皆沒唯何氏存叔父乃謂致雍曰我家世
貧賤吾復老矣何僕射必汝也善自愛致雍後於湖南為
節度判官會楚王殷自稱號以致雍為戶部侍郎翰林學
士後楚王希範嗣立復去帝號以致雍為節度判官檢校
僕射借神錄按泚殷僭號皆天討所當加也其所爵者非
天命可知矣而光晟之相致雍之僕射何足兆夢豈
遺物耶

名係葛瓊食祿全蜀

韋臯為張延賞壻落魄不得志一夕夢神人語云吾子名

係葛瓚祿食全蜀富貴將及他日毋忘葛瓚後節度全蜀
乃作南宮閣四十範金刻石自製碑文志之蓋臯本命丁
卯屬葛瓚也蜀異記

二郎祿料

吳越元瑋次子文奉以蔭為中吳軍衙內都指揮使夢在
郡登烏鵲橋見禽獸充牣城中旁一人云此二郎祿料也
後改節度副使幾三十年及嗣元瑋為節度使累加至檢
校太尉中書令壽八十一蘇州志

兩季俸支牒已行

張轅自奉天尉將調以李錡在浙西與已有舊欲往干謁

之未至夢人送官誥至下張轅可袁州新喻令轅言已曾
爲赤尉不應作此官不肯受其人曰兩季俸支牒已行遂
委之而去及轅見錡錡以轅選限尚遠勸署毘陵鹽鐵場
官轅以貧故強受之既至視簿書所用印乃新喻廢印也
四月領務九月而罷支兩季俸云

河南尹

王播登第後夢爲河南尹視事有二客至東西坐東者曰
崙邦如何處置西者曰已科決遍出界訖覺而書于誥牒
後別紙上後二十年果除河南尹既至三日洛陽令與分
司郎官偕至問荅一如所夢蓋郎官奴竊物而逃送邑邑

斷如此播命取官誥後所志驗之相與歎異云

夢談

長白山主

歐陽脩次子仲純夢為長白山主明年卒

呂丞相

梅詢坐議天書出知濠州夢人告曰呂丞相至矣既而呂夷簡通判州事待之甚厚其後援之廢斥中登貴顯皆夷簡力焉

宋史

龍首山人

楊寘在慶曆年舉進士第一授將作監丞通判潁州未至官卒初其友夢寘作龍首山人寘自謂龍首我四冠多士

也山人無祿位之稱我其終是乎已而果然

宋史

神人畀以騎都尉

喬執中性仁厚歷官至刑部侍郎後復以寶文閣待制知鄆州執中屢與刑獄雪活以百數一夕夢神人畀以騎都尉詰曰為客言之少焉談笑而逝時年六十三

宋史

宰相項安節

神宗嘗夢入大第有植牌以金填字曰宰相項安節寤而求之乃太學生也慈聖解之曰項安節卽吳充也頸有瘤

焉

后山談叢

明日有宰相來

文潞公彥博少時從其父赴蜀州幕官過成都入江濟廟
觀畫壁官接之甚勤且言夜夢神令灑掃祠庭明日有宰
相來公豈異日之宰相乎潞公笑曰宰相非所望若為成
都當令廟室一新慶曆中路公以樞密直知益州謁廟方
經營改造江中忽漲大木數千章蔽流而下取以為材廟
成壯甲天下信乎事有前定而鬼神能窺其機也聞見錄

樞密直學士

羅彥國累試不第祈夢於梓潼神夢神謂曰已除君樞密
直學士矣明年彥國復下第投牒乞進舉推恩授密州文
學蓋密學之應也夢談

賜五子科第

宣和中方臘犯諸暨其士人黃汝楫以財物一萬緡贖賊所掠士女千人夜夢神告曰上帝以汝活人多賜五子科第其後子開閣開門闔皆登第焉

閱登科集

宋孫洪與同舍生游太學生得家書秘不示洪洪詰之不巳出書示之書云昨夜夢至一官府若閱登科集汝與孫洪皆列名籍中其孫洪名下有朱字云於某年不合與人寫離婚書上天譴之不得過省洪愕然生曰公果有此事否洪曰有之及就試生果中高第而洪不得選暨生西歸

爲尋夫婦合其已離明年洪始釋褐

馮侍郎在此

馮京少孤寓武昌縱飲不羈一夕醉臥郊外溪邊有漁者罷漁艤舟而寢有人叱之曰馮侍郎在此安得不避漁者驚起登岸見一人衣冠熟寢草間詢之知爲馮也因請臥舟中以避風露具以夢告且曰秀才他日貴顯幸無忘馮睡至曉共載入郡其後馮貴使訪漁舟不復見

灑水燕談

侍郎也

熙寧初黃庭堅宿石塘寺寺有鬼靈異僧敬信之一夕夢曰分寧黃刑部至僧曰侍郎乎尚書乎曰侍郎也及南遷

年已六十親故以爲憂黃曰宜州者所以宜人也且石塘
鬼侍郎之言豈欺我哉而黃竟沒於宜州誰謂鬼可信也
聞見錄

陽明府侍郎

陸洎爲淮南副使和雅重厚時輩推之副使李承嗣尤與
之善乙丑歲九月承嗣與諸客訪之洎從容曰某明年此
月當與諸客別矣承嗣問其故荅曰吾向夢人以一騎召
去止大明寺西可數里至一大府署曰陽明府入門西亭
復有東向大門下馬入一室久之吏引立塔下門中有二
綠衣吏捧一案案上有書一紫衣秉笏取書宣云洎三世

爲人皆行慈孝功成業就宜授此官可封陽明府侍郎判
九州都監事來年九月十七日本府上事復以騎送歸遂
寤靈命已定不可改矣諸客皆嘻至明年九月十六日承
嗣復與向候之客詣之謂曰君明日當上事今何無恙也
洎曰府中已辦明當行也承嗣曰吾嘗以長者重君今無
乃近妖乎洎曰唯君與我有緣他日必當卜鄰承嗣默然
而去明日遂卒葬于茱萸灣承嗣後爲楚州刺史卒葬于
洎墓之北云

稽神錄

與汝余都主簿

浦城李景韓謁城隍廟求子夢人謂曰大王與汝余都主

簿因而生男遂名之曰夢祥弱冠登第任余都主簿到官
謁城隍神廟見有一判官倒于階下從者見其貌似夢祥
爲言之夢祥問廟祝此判官倒幾年云已經二十六年時
夢祥年正二十六憮然曰殆我也倩工粧塑工畢而夢祥

卒
夢談

中丞推勘

紹興中辛次膺爲湖襄提刑至武昌岳少保飛通謁執辛
手曰前夕夢中丞推勘驚寤不敢告人而津吏適報公至
公他日必爲獨坐願公救護之後數年岳罷副樞奉朝請
故部將王貴迎秦檜意告飛謀叛繫大理獄命新除中丞

何鑄勸其事方悟所夢非辛乃新除中丞也

美堅志

居挂金書狀元坊

黃公度鄰人王氏夢其居挂金書榜曰狀元坊自謂子孫必應兆每誇語於里閭久而益貧所居歸於黃氏不數日公度捷書到

及第作十三魁

馬洵既赴御試夢人告之曰子欲及第須作十三魁洵歷數其在太學及預薦送止作十二魁心甚憂之意疑復黜落也逮賜第魁天下果十三魁

春渚記聞

宣教郎

宋廖德明少夢懷刺往謁大乾廟廡下謁者索刺出諸神
視其題字云宣教郎廖遂驚覺後登第改秩以宣教郎宰
閩諸迂者及門思前夢恐官止此不欲行親朋勉以不足
芥蒂德明乃之任後把麾持節官至正郎

江南秀才來見

楊吳之剋豫章也中書舍人徐善與妹為一軍校所虜既
定軍校請以禮聘之善自以宦族不當與戎士為婚固不
許校乃強納幣竟虜之而去善卽詣楊都求見楊渥而訴
之時渥初嗣藩服府廷甚嚴僭擬王者布衣游士旬歲不
得一見而善始至白沙渥夜夢人來言曰江南有秀才徐

善將來見公今在白沙逆旅矣其人良士也且有情事公可厚遇之且卽遣騎迎之既至禮遇甚厚且問所欲言善具白其妹事卽命贖歸時欽州刺史陶雅聞而異之因辟爲從事稽神錄

吏部都水司

吳員外瑞初登第其同年吳洪夢瑞牙牌上刻吏部都水司初不解後瑞選南京吏部考功主事竟轉工部都水司員外始驗夢云夢談

稱黃狀元

都陽士人黃瀛宣和間在太學負俊聲屢夢人言黃狀元

因自待不淺時與交友言之然每入舉場輒不偶紹興八年以免舉赴省試而黃公度魁多士瀛始悟歎曰二十年夢黃狀元今乃爲他人所奪怏怏而歸久之僅得特奏名攝官而卒

夷堅志

來春及第

柳璟知貢舉有國子監明經晝夢徙倚于監門有一人負衣囊訪問其姓氏明經語之其人笑曰君來春及第明經遂邀入長興里畢羅店常所過處店外有犬競驚曰差矣夢覺遽呼鄰房數人語其夢忽見長興店子入門曰郎君與客食畢羅計二斤何不計直而去也明經大駭解衣質

之且隨驗所夢相其榻器宛如夢中乃謂店主曰我與客俱夢中至是客豈食乎店主驚曰初怪客前畢羅悉完疑其嫌置蒜也來春明經與鄰房三人夢中所訪者悉上第

酉陽雜俎

官帶陽字

員外郎樊系未應舉前一年嘗夢及第榜出王正卿為榜頭一榜二十六人系官帶陽字明年方舉登科之後果是王正卿為首人數亦同系又自校書郎調選吏部侍郎達奚珣深器之一注金城縣尉系不受珣云校書得金城縣尉不作更作何官系曰不敢嫌畿尉但此官不是系官珣

云合得何官系云夢官合帶陽字珣歎曰是命也因補涇

陽縣尉

定命錄

拜官前後

潘玠與趙自勤同選俱送名上堂而官久不出玠云已作
夢官欲出矣夢玠與自勤同謝官玠在前行自勤在後及
謝處玠在東自勤在西相視而笑後三日官出果玠爲御
史自勤爲拾遺同日謝初引玠在前先行自勤在後入朝
則玠於東立自勤於西立兩人遂相視而笑如其夢焉

命錄

官誥不到

江南大理司直邢陶夢人告云君當爲涇州刺史旣而爲
宣州涇縣令考滿復夢其人告云宣州諸縣官人來春皆
替而君官誥不到邢甚惡之至明年春罷歸有薦邢爲水
部員外郎牒下而所司失去復請二十餘日竟未拜而卒

稽神錄

李彥榜下及第

金李世弼從外家受孫明復春秋貞祐初三赴廷試不第
推恩授彭城簿鬱鬱不得志遂復求試一夕夢在李彥榜
下及第時計偕無此人其子昶年方十六已能爲程文乃
更其名曰彥至定興二年父子廷試彥果以春秋中第二

甲第二人世弼中三甲第三人

長吳正官

元干文傳方成進士夢入選掛名爲長吳正官覺而笑曰我吳人安得作長吳二縣正官必無此理初授官階承事郎昌國州同知益笑前夢之不足徵也次當改選乃授平江路長洲縣尹無何改知烏程轉婺源州知州自以爲前任長洲偶與夢符耳今已升知州安得再爲吳縣正官既而調吳江州知州亦長吳正官也

姑蘇志

彭岳二元

正統戊辰狀元則彭學士時而會元則岳學士正也先是

丁卯冬湖廣永濟縣須知官在途夢開黃榜第一名彭時
國子監生此官至京向永濟監生張端本言之端本以告
彭彭曰夢中事何足信又一人謂岳曰吾昨夜夢兒魁多
士可賀岳曰若夢可信昨有人夢彭時作魁矣其人戲曰
會試廷試各有一魁焉知非二君已而果然

狀元至我家

孫學士賢赴會試途中投客店主人具飲食致敬於孫
疑其家有他會問之主人云昨夜夢狀元至我家今日必
應此夢矣是科下第歸來科果及第

狀元錄

一舉中雙元

李侍郎旻與王尚書華同鄉試考官取華爲解首監臨謝御史嫌華白衣乃更李主文者夢中得一舉中雙元之句後王華辛丑狀元李旻丙辰狀元果符夢云

狀元記事

科第與吳寬同

松江錢翁中子名福生數歲矣夢二女來謂曰汝子科第當與蘇州吳寬同因至蘇訪吳寬吳時尚困庠舍然人皆稱其德優學博乃曰吾兒便不得科第得名齊吳君足矣及吳狀元及第而福亦以狀元發跡

客座新聞

登第在狀元前

松江張進士黼未第時嘗夢人謂曰汝登第在狀元前覺

而思之世豈有科名先狀元者吾殆無此望矣及丁未會
試名在十五鉛山費學士宏名在十六是科宏狀元及第
計得夢時費尚未生也

震澤長話

劉登費狀元榜

劉進士良初中景泰丙子湖廣鄉試既而十赴春闈潦倒
衰白人皆鄙之嘗自誇曰進士必為我有但時未至耳凡
赴試必徧訪天下舉人姓費名宏者屢科不得及成化丁
未聞鉛山有費宏乃至其邸飲酒沾醉撫掌大笑謂宏曰
今科狀元必子吾三十年前夢神告曰汝登進士必費宏
作狀元累科覓子今得之矣及開榜費與劉皆得第而廷

試費果狀元

客生新聞

卷之七

二十七

來科狀元

呂少宗伯榘至孝方會試聞喪痛哭草履步至家途中夢
有人報來科狀元

折臂太守

詳人身部劉之遴

正鼻郎

詳人身部徐郎中

位至正郎

詳什百部查道

石轉三匝至三公

詳陵墓部陽休之

旂常部

旗旛

大幡出指端

劉仁恭自言夢大幡出指端年四十九當建旄節李國威
忌之補景城令後果建節云

旛花羅列空中

大同元年九月六日釋慧約現疾謂弟子曰我夢四部大
衆旛花羅列空中迎我凌雲而去福報當訖至十六日勅
遣舍人徐儼參疾荅云今夜當去至五更合掌便入涅槃

爵祿

龍旂豹尾

陳劉皇后年十七歲時裴方明為子求婚酬許已定后夢先有迎車至猶如常家迎法不肯去次有迎車至龍旂豹尾有異於常后喜而從之既而與裴氏不成婚竟嬪於帝

陳書

旌旗迎光王

太子賓客盧真有猶子曾為沙門會昌中沙汰歸俗廕補為光王府參軍一日夢前師至其家而問訊焉盧告官非其願常思落髮再披緇褐師曰汝誠有是志像教興復非晚也語未竟俄回面見日月旌旗千乘萬騎喧言迎光王

卽皇帝位未幾武帝崩光王果卽皇帝位至是竟符其事
焉宣室志

李衛公請造旗旛

乙未歲契丹據河朔晉師拒于澶淵天下騷然疲於戰伐
翰林學士王仁裕奉使馮翊路由于鄭過僕射陂見州民
及軍營婦女填咽於道路皆執錯彩小旗子插於陂中不
知其數詢其居人皆曰鄭人比家夢李衛公云請多造旗
幡置於陂中我見集得無數兵爲中原剪除寇所乏者
旛旗耳是以家家獻此幡幟初未之信以爲妖言旬月間
擊敗胡虜及使迴過其陂使人訪于草際旗旛存者尚多

旌旗鶴鴈降庭

宋富弼母韓有娠夢旌旗鶴鴈降其庭云有天赦已而生弼爲宋室賢相

黃旗插門

孫學士賢未第之先夢金甲神人持黃旗插其門有狀元二字至廷試果首擢

立黃旗於門上

平江士人姓潘初名某其母夢神人立黃旗於門上乃易名夢旗復自夢神曰當用交龍爲旂之旂遂更夢旂是歲

果登科 夢談

幢輶自天下

張秋官鳳翔舉進士角尚少聲大起一旦病疽告休沐夢
幢輶冉冉自天下廣樂導之若迎已者及病之革也起端
坐索紙筆掃詩一十八章言意漫渙弗次漸昏漸竭末詩
有一章三句者一章一句二句者投筆而氣絕矣時部察
李夢陽王崇文經紀其喪事既以之歸葬洵陽夢陽復上
孝廟言鳳翔老母孤兒幼妻不免凍餒溝壑乞追繹鳳翔
犬馬之微勞體古敝帷敝蓋之義查例勅有司月給米一
石養贍終其毋妻之身奏下吏部准行 空同集

瓜錘

前列瓜錘

唐侍講臯嘗夢前列瓜錘一對未嘗語人及廷試果第一蓋狀元傅臚後以黃蓋瓜錘送歸第故也

印

六印加劍上

宋凌策初登第時夢人以六印加劍上遺之其後知益州往劍外凡六任云

宋史

帶印綬登樓

詳棟宇部張奐

碑

得古斷碑

後晉寶雲寺僧一日夢於舊寺基水際得古斷碑云寺南

高基乃顧野王脩輿地志處也明日果得碑乃於其上建
野王祠元成廷珪詩云塵銷壞壁書千卷土蝕殘碑字幾
行正謂此也

松江志

宰相碑

杜鴻漸之父名鵬舉父子而似兄弟之名蓋有由也鵬舉
嘗夢有所之見一大碑云是宰相碑已作者金填其字未
者刊名於柱上因問有杜家兒否曰有任自看之記得柱
下有鳥扁旁曳脚而忘其字乃名子為鴻漸後果拜相

瘞碑暨碑

在吏部鵬初中嘉靖丁酉應天鄉試夜夢數十人昇一碑

補

若題名記然中有丘名瘞之無何錄入世廟惡其策以
祀戎發問語涉大禮遂逮試官黜舉子不得應制至庚子
冬復夢數十人發此碑豎之且囑丘以得第後勿作官作
官當不壽既寤向人談之未幾有詔許前科應天舉人
入試丘遂中會試以夢故不敢試大廷歸三年復試
大廷釋褐郎署不久轉吏部竟卒

刻碑舊文磨沒

詳黃冠部許旌陽

春榜

于觀文入試夢人以軸文與之曰此春榜也可收之既覺

自解曰令我收榜吾其瑣榜乎放榜果然

該聞錄

笏

積笏如山

章得象始生其父負夢其庭積笏如山後得象進士及第拜相封郇國公

宋史

金龜

吞金龜

劉贇夢吞金龜文思大進為孟蜀學士一日夢吐龜未幾卒

珮

解珮帶履

樂彥貞嘗夢解珮帶履而行既寤曰此神告我下將有悖逆乎已而果有軍亂

神常

盤囊
斷盤囊

鄧攸爲淮南太守夢行水邊見一女在後來斷盤囊者以爲水邊女是汝字斷盤囊者是新虎頭也不作汝南當汝陰果選汝陰

王隱晉書

牌扁
扁中釘丁

宋徐儼夫幼夢家有狀元扁中釘以丁儼夫狀元及第後與丁謂大不合

牌扁

初崑山張安甫在祁州嘗夢得一狀元牌扁明日偶因公事出至橋上適見一木浮水面問居民皆不知所自就令

人作牌扁自書明倫堂三字寄歸崑山學中以寓期祝之意乙卯秋恭靖朱公希周夢取此牌扁回家以爲鄉貢之兆已而果得狀元云

辛巳狀元牌扁

楊脩撰惟聰在京師崇文坊夢迎金字辛巳狀元牌扁來扣之何往曰送與固安楊秀才覺自喜但疑是歲非試期既而乙卯庚辰鄉會聯捷因武宗南巡未暇廷試至肅皇登極舉之實辛巳歲也

牌換字

宗伯瞿公景淳夢有人持一牌示之四圍皆五彩粧飾如

雲中寫案首二字須更此牌中換會元二字頃又換榜眼
二字及發考案至登科名皆不爽云

移狀元扁

張殿撰元忭居羅宗伯萬化同里對戶羅旣大魁天下張
尚未第一夕夢移其扁於家及廷試果以狀元及第云

扁
方簡二片

商文毅輅應浙江乙卯鄉試與姚文敏夔同舟夔夢一吏
持方簡一片至舟連呼解元者二簡上有商輅二字夔問
曰我中否其吏轉過簡後示之又有姚夔二字是科商第
一戊午姚第一

神人朱衣象簡

詳醫藥部陳太后

籤

入監領班籤

費學士宏之上春官也伯父瑄方以都水主事治呂梁貽之書曰汝脫下第毋南歸宜入北監讀書丙午還宏詢之曰伯父何以知宏之弗第而必令入北監也瑄笑曰此爾遠到之兆也吾嘗夢汝入監領班籤籤乃彭文憲故物也文憲嘗游北監中狀元矣汝勉之至成化丁未果狀元及第狀元錄

鹵簿

犯鹵簿應髡

名姓

詳人身部蘇韶

鹵簿入廁中

詳棟宇部沈慶之

冕

元伯玄冕垂纓

詳彛倫部范式

名姓部

命子名虞

周武王與叔虞毋會時夢天謂武王曰余命女生子名虞
余與之唐及生子文在其手曰虞故遂應命之曰虞武王
崩成王立唐有亂周公誅滅唐成王與叔虞戲削桐葉爲

珪以與叔虞曰以此封若史佚因請擇日立叔虞成王曰
吾戲之耳史佚曰天子無戲言言則史書之禮成之樂歌
之於是遂封叔虞於唐

史記

請待公孫彊

曹人或夢衆君子立于社宮而謀亡曹曹叔振鐸請待公
孫彊許之旦而求之曹無之戒其子曰我死爾聞公孫彊
爲政必去之及曹伯陽卽位好田弋曹鄙人公孫彊好弋
獲白鴈獻之且言田弋之說說之因訪政事大說之有寵
使爲司城以聽政夢者之子乃行彊言霸說於曹伯曹伯
從之乃背晉而奸宋宋人伐之晉人不救宋滅曹執曹伯

及司城彊以歸殺之左傳

昌明爲字

簡文帝見讖云晉祚盡昌明及李后懷孕夢神人謂之曰
汝生男以昌明爲字及產武帝東方始明因以昌明字之
簡文帝後悟乃流涕晉祚自此傾焉

晉紀

俾壽且貴

宇文貴母方孕夢老人抱一子授之曰賜爾是子俾壽且
貴及生形類所夢故名之曰貴而以永貴字之

北史

可名青建

齊董賢明爲越騎校尉妻宋氏有娠夢有人語之云爾必

生男體上當有青誌可名爲青建及生男如言名之後青建十四西州辟主簿建元初爲水曹參軍

二人姓李乞命

梁南郡太守劉之亨嘗夢二人姓李請之亨乞命之亨不解其意明日有人遺生鯉兩頭之亨曰必夢中所感乃放之其夕夢二人謝恩云當令君延一算

渚宮舊事

自稱子瑜

涼文王張駿夢一人鬚眉皓白自稱子瑜曰地上之事付汝地下之事付我王寤問之有侯子瑜先死得其曾孫亮以爲祁連令

燉煌錄

李故言及第

元和六年韋詞爲宛陵廉使七月夢一人投刺視之瞭然見題其字曰李故言俄有人言明年狀頭詞旣寤以名中少有故字疑之至八月果有取解舉人具名投刺一如夢中但故爲固耳詞乃曰足下明年必擢第仍居衆君之首無何果爲榜首

爾改名畢

杜牧嘗夢人告曰爾改名畢牧以爲不祥其年果卒

唐書

諸門悉署權字

唐程執恭領滄涼節度使嘗夢諸門悉署權字乃改名權

後朝廷詔鄭權代之

唐書

吞芝名子

唐申泰芝洛陽人其母楊氏夢人與芝吞之曰以名子已而得子遂名泰芝稍長遊南岳遇異人授金丹白晝淨舉

江陽部民李珏

唐丞相李珏節制淮南一夕夢入洞府見石壁填金書姓名內有李珏字方自喜有二仙童云此乃江陽部民李珏耳既寤詢之民間果有廣陵人李珏者年近百歲究其生平所為以販穀為業每斗惟求利兩文有糶糶者即授以升斗俾自量之意以此得果報云

廣陵志

職官姓名

劉守光爲燕王有尼出入其母所張殷袞托尼求一文學
不得一夕殷袞夢入衙署內多簿書而無守攝乃潛升廳
事見案上大簿云職官姓名乃檢河北道見守光及文武
職掌莫不有名便捉筆自書文學張殷袞但倉卒墨色頗
淡卽驚覺因識之論語策後翌早守光遣人齎一牒與殷
袞卽文學牒也劉母讓守光曰我爲尼數言不與今何忽
與之守光曰兒昨夢朱衣吏來言張殷袞已注下爲文學
訖故與之也殷袞得牒視姓名墨色果淡晉天福中其子
希永嘗出父論語後所記示人云

檀香樹爲名

劉審義夢一人引上檀香樹謂劉曰君速登以爲名覺後因改名檀無何授殿中侍御史或以爲糾彈之義云

候王化基草制詞

何績太平興國中任秘書丞度支制官王化基任著作郎開封推官績一日在省夢入官府如中書制勅院官吏憧憧出入皆若有所除授其中喜者沮者相半皆形于色績見衆人紛紛亦前詢問到一房見朱衣吏據案而坐簿書堆積如堂後官之狀績因前揖之問曰衆人皆除改其與數否朱衣若有所閱視徐曰亦有但候王化基草制詞因

出而夢覺遂言于化基未幾化基果超擢知制誥又數月
續授虞部員外郎出知刑州官誥果化基之詞

劉悅

劉濤宿梓潼祠下夢與舉子數百趨禁中聽唱名于集賢
殿俄有一衛士來曰公第三人及第濤問曰劉濤耶衛士
曰非也已而傳臚則劉悅也遂驚覺至元祐詔書若與上
書邪人同姓名者聽改名時有彰信軍進士劉濤例因改
名乃憶昔夢改濤爲悅果中蔡疑榜第三人

靈應集

須求元公

王汾作館職忤王安石乞外任不許夜夢人告之曰子欲

得郡須求元公時元厚之爲參政汾往求之厚之曰介甫意思不婉順未可議也然介甫屢爭事不合恐旦夕出矣姑俟之未幾安石果出知金陵汾竟得交州不惟厚之之言驗而充字亦元公也

逢丁可

常州丁逢夢人告曰汝欲得第須逢丁可逢以爲丁歲乃改名逢期欲應之至隆興元年省榜出果有天台丁可姓名然度其官未應作試官也及軋道元年秋試丁可待闕家居漕使聘爲考官逢自慶必得矣無何可以病出院逢大懊惱然出榜則有名究其故乃可去時執一卷囑他試

官云自得此卷便擬寘前列願勿遺之雖死亦瞑目及會
卷時各有所主不暇爲計也適已取一卷犯諱當斥遂以
逢卷補之亦由可力云

當同陳臯

魏清累舉不第將入試夢人云當同陳臯是年臯第五而
清下第後三載清亦第五計臯與清得第皆第八舉矣始
臯爲餘干尉至此任滿亦除餘干尉適交代焉

已名及惠純夫

陳正居國子監候紹興壬子試夜夢登一大堂挂黃榜於
梁間問之人云此明春榜也正欲觀之爲風飄颺不定彷彿

佛但見已名及宜興惠純夫耳迨明年試後路過宜興報
捷人因問云貴縣有誰其人附耳語以純夫正大喜躍未
幾捷音果至

夢談

名上朱汚

顧太守禎夢其弟福中榜名上朱汚以語福及福自觀榜
名乃在糊縫鉗印處爲朱濺焉後福官至叅政

夢談

楊邁金

林邑謂紫磨金爲上金俗謂之楊邁金楊邁母夢人鋪楊
邁金席與其生兒兒生席色昭晰後因名兒曰楊邁爲林

邑王

林邑記

濮陽聯名

楊敬之任江西觀察使其子戴隨任江西應舉時敬之勞
新榜四十進士歷歷可數寓目及半其子在焉其鄰則姓
濮陽而名不可別既寤大喜訪於詞場則云有濮陽原者
爲文甚高且有名譽遂尋其名則曰閩人一日楊祖客灞
上客未至俟于逆旅有自遠來者試詢之乃貢士也偵所
自曰自閩問其姓曰濮陽審其名曰愿楊公曰吁斯天啓
也遂命相見濮陽逡巡不得讓~~其~~所業以進閱其人眉宇
清朗詞氣安詳其文體理精奧問所寓則曰今將僦居楊
令盡驅其行李置于庠序命戴與朝夕同處是冬大稱濮

陽藝學于公卿間人情翕然得第必矣而濮陽一夕暴卒
楊惋痛嗟駭搜囊甚貧力爲營辦歸骨閩間仍謂其子曰
我夢無徵汝之一名亦不可保明年其子及第而同年竟
無濮陽者夏首將闕送于吏部時宰相有言前輩重族望
輕官職是歲慈恩寺題名咸以族望題畢楊間步塔下仰
視之曰弘農楊戴濮陽吳當恍然如夢中所覩云唐闕史
去之自當通泰

宋嶽十舉而名未播大中十一年將取府解晝寢似有人
報云宋秀才若頭上戴山無因成名但去之自當通泰覺
來便思去之不可名嶽遂去二犬乃改爲言及放榜以第

名姓

四人及第

雲溪友議

火山軍

歐陽脩與試事主司或夢火山軍得名後歐所取卷乃劉
輝也

筆談

更名穎叔

曹熙夢之官府見有曹穎叔名遂更名穎叔字秀之後以
進士及第歷官天章閣待制

宋書

書簿名槩

趙槩初名裡嘗夢神人金書名簿有趙槩者遂更名應之
後登進士第歷官至吏部尚書為宋名臣云

汝是大吳

蘇文忠軾年十四時夢人謂曰汝是大吳後得第卷上乃吳字號也

夢談

漢將軍鄧禹

范祖禹之母有娠夢一異人入寢室自稱漢將軍鄧禹故生而以祖禹名焉卒為宋名臣云

宋書

老人星見

臧愚字仲回少孤嘗夢其父召於庭向空指曰老人星見矣因望而拜既寤私喜以壽星出內入丁乃改名丙字夢壽後官至諫議大夫知江陵府卒壽五十三

宋書

韓琦

元絳叔赴試夢至一堂榜曰侍中堂堂中列人姓名有韓琦字時琦未第後果拜相

第三人孫抃

孫夢得初名貫字道卿嘗語人曰某舉進士過長安夢登塔見持一大文卷者問之云來年春榜索而視之不可問其間有孫貫否曰無惟第三人有孫抃既寤遂改名抃字夢得明年果得第三

東齊記事

涓涓不絕

馬涓之父從政中年未有子實一妾見其約髮以白絲而

以絳絺蒙之詢其故乃父母死不克葬故自鬻遂遣還不責所負後夢一翁謝曰我君向所買妾之父也聞之上蒼矣願君家富貴涓涓不絕及生子因以夢中語名之曰涓後中元祐辛未狀元

春渚記開

弓輿不得

弓輿潭州人乾道四年冬偕鄉里六七人赴省試過宜春謁仰山祠祈夢輿夢至官府見柱揭紙一片書弓輿不得四字但不字稍聯接上下而中乃空既覺殊不樂自謂必下第及入試輿中選同祈夢者盡黜始以語人謂夢不驗好事者曰不字斷乃一个也神言弓輿一个得耳

陳德遇

江南右藏庫官陳居讓字德遇直宿庫中其妻在家忽夢
二吏手把文書自門而入問此陳德遇家耶曰然德遇何
在曰在庫中吏將去妻追呼之曰字德遇耳同里有主亦
庫官亦姓陳名德遇者家近在東曲二吏相視而嘻曰幾
誤矣遂去數日名德遇者晨起如廁自云有疾還臥良久
遂卒

精神錄

胡蘆

一士人至九仙廟祈夢初夢仙語之曰胡蘆未生其年下
第後及期再往祈之則夢仙曰胡蘆已生是年又下第又

及期祈之則又夢仙云胡蘆未成是年又下第其士人偃蹇不復往祈亦不得第一日爲同儕所拉復往祈之夢仙云胡蘆已成士人驚寤向同儕言之俱不能解是年遂得第觀榜其前一人姓胡後一人姓盧皆弱冠計其年則始祈夢時皆未生也聞者莫不神之且知功名遲速有定數云

孔老人

文溫州林將之任祈夢於九仙廟夢中語以問孔老人文既寤殊不解及蒞任命工解板修官船其督工老人姓孔方解板竟向文稟復林心已訝之乃問其數孔云板止五

十七塊又問之曰止此無餘矣時文年五十七聞言大驚

便覺背上有芒刺不崇朝而疽發背上卒

溫州仲子符陽公手書其事甚

蹟存焉

高嵯峨在何處

都太僕穆初習舉子業尤攻古文托閩人黃體忠代祈九
仙夢夢神謂曰高嵯峨在何處後以古學受知於新昌何
巡撫鑑乃爲推轂於莆田林齊學塘遂應南都試中弘治
乙卯舉人而本房則高學論士達始悟高與何二姓爲應
夢云

狀元名鼎臣

顧文康父嘗夢名鼎臣者為狀元初欲以是名其孫潛不果乃命其少子是為文康云

登杜正榜

少傅余公有丁嘗夢登杜正榜進士既第以為夢不驗矣及榜首申公入領袍笏其典之者內臣杜正也是夢亦巧矣哉

大風吹塵

詳天象部黃帝

號之曰牛

詳天象部穆子

名之曰蘭

詳品物部鄭伯

立於石上

詳棟字部鄭僑第一次溫陵石也

勵改爲礪

詳什百部楊礪

更名宗儒

詳聖賢部黔南軍

夢占類考卷七